

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo industrije, energetike i rudarstva

P R A V I L N I K
o obavljanju tehničkog pregleda rudarskih objekata,
postrojenja, uređaja i instalacija

Tuzla, mart 2012. godine

Na osnovu člana 34. stav 10. Zakona o rudarstvu Tuzlanskog kantona ("Službene novine Tuzlanskog kantona", broj: 14/11), ministar industrije, energetike i rudarstva u Vladi Tuzlanskog kantona, d o n o s i:

P R A V I L N I K

o obavljanju tehničkog pregleda rudarskih objekata, postrojenja, uređaja i instalacija

I – OPĆE ODREDBE

Član 1. **(Predmet Pravilnika)**

Ovim Pravilnikom se radi izdavanja dozvole za upotrebu propisuje: postupak obavljanja tehničkog pregleda rudarskih objekata, postrojenja, uređaja i instalacija (u daljem tekstu: tehnički pregled) izgrađenih na osnovu glavnog i dopunskog rudarskog projekta, način imenovanja i rad komisije, sadržaj zapisnika o izvršenom tehničkom pregledu, naknada za rad članova komisije, izdavanje i sadržaj rješenja – dozvole za upotrebu.

Rudarski objekti, postrojenja, uređaji i instalacije izgrađeni na osnovu glavnog i dopunskog rudarskog projekta mogu se pustiti u probni pogon najduže do šest mjeseci poslije izvršenog tehničkog pregleda od stručne komisije koju je formiralo privredno društvo.

Član 2. **(Postupak obavljanja tehničkog pregleda)**

Prije izdavanja dozvole za upotrebu rudarskih objekata, postrojenja, uređaja i instalacija od strane Ministarstva industrije, energetike i rudarstva Tuzlanskog kantona (u daljem tekstu: Ministarstvo), obavlja se tehnički pregled kojim se utvrđuje da li je rudarski objekat i postrojenje izgrađen prema odobrenom projektu, da li je usklađen sa propisima, mjerama i normativima zaštite na radu i obaveznim standardima, da li je tehnički ispravan i da li ugrožava okoliš, život i zdravlje zaposlenika i građana.

II – PODNOŠENJE ZAHTJEVA ZA TEHNIČKI PREGLED

Član 3. **(Potrebna dokumentacija)**

(1) Zahtjev za tehnički pregled privredna društva koja eksploatišu mineralne sirovine iz tačke 1., 2. i 3. člana 4. stav (1) Zakona o rudarstvu Tuzlanskog kantona (u daljem tekstu: Zakon), podnose Ministarstvu.

(2) Uz zahtjev za tehnički pregled privredno društvo prilaže:

1. Rješenje o ispunjavanju uslova za obavljanje registrovane djelatnosti,
2. Spisak objekata i opreme;
3. Spisak projekata prema kojima su izgrađeni objekti, postrojenja i uređaji uz navođenje broja dozvole pod kojim su odobreni;
4. Spisak kadrova;
5. Spisak isprava i šifre o izvršenim periodičnim pregledima oruđa za rad i uređaja, odnosno radnih i pomoćnih prostorija koji podliježu obaveznim periodičnim pregledima i
6. vodnu dozvolu.

(3) Troškove tehničkog pregleda snosi privredno društvo .

III – KOMISIJA, TEHNIČKI PREGLED, ZAPISNIK, DOZVOLA ZA UPOTREBU

Član 4. (Imenovanje i rad komisije)

Po podnesenom urednom zahtjevu u skladu sa važećim propisima ministar rješenjem imenuje Komisiju za tehnički pregled (u daljem tekstu: Komisija).

Član 5. (Sastav Komisije)

- (1) Komisija se sastoji od predstavnika Ministarstva koji je ujedno i predsjednik Komisije, i potrebnog broja članova koji se određuje na bazi specijalnosti, složenosti i obima predmeta tehničkog pregleda.
U radu Komisije učestvuju i predstavnici organa koji je izdao urbanističku saglasnost i okolinsku dozvolu, kao i predstavnik rudarske inspekcije.
- (2) Predsjednik i članovi Komisije mogu biti lica koja ispunjavaju uslove propisane članom 50. zakona.

Član 6. (Rješenje)

- (1) Pored sadržaja propisanog važećim Zakonom o upravnom postupku, rješenje sadrži i iznos naknade i rok u kome je podnosilac zahtjeva dužan izvršiti uplatu na ime naknade troškova tehničkog pregleda u korist Budžeta Tuzlanskog kantona, rok u kome je Komisija dužna izvršiti zadatak, i naznaku da će se troškovi vođenja postupka (putni troškovi i dnevnice) utvrditi shodno Zakonu o upravnom postupku.
- (2) Iznos troškova iz stava (1) ovog člana utvrđuje se na bazi norma sati potrebnih za obavljanje tehničkog pregleda.

Član 7. (Naknada članovima Komisije)

- (1) Po izvršenom tehničkom pregledu Komisiji će se isplatiti naknada, u skladu sa važećim propisima.

- (2) *Predsjedniku i članovima Komisije pripada naknada za rad, čiju visinu rješenjem određuje ministar. Visina naknada članovima Komisije se utvrđuje na osnovu troškovnika koga odobrava ministar.*

Član 8.
(Sadržaj zapisnika)

- (1) *Nakon tehničkog pregleda obavljenog u skladu sa članom 2. ovog Pravilnika, Komisija sačinjava zapisnik.*
- (2) *U zapisnik se unose svi relevantni podaci, zapažanja pregleda i eventualne primjedbe i nedostaci i to:*
1. *da li je predmet tehničkog pregleda izgrađen u skladu sa odobrenim projektom,*
 2. *da li je izvedeno stanje u skladu sa važećim propisima, mjerama i normativima zaštite na radu i obaveznim standardima,*
 3. *da li je predmet tehničkog pregleda tehnički ispravan i*
 4. *da li predmet tehničkog pregleda ugrožava okoliš, život i zdravlje zaposlenika.*
- (3) *Zapisnik potpisuju svi članovi Komisije i učesnici u pregledu ispred privrednog društva.*
- (4) *Ovlašteno lice podnosioca zahtjeva imenuje učesnike u tehničkom pregledu ispred privrednog društva.*

Član 9.
(Otklanjanje nedostataka)

Za otklanjanje eventualnih nedostataka u zapisniku se daje rok u kojem je podnositelj zahtjeva dužan iste nedostatke otkloniti.

Nakon otklonjenih nedostataka u zadatom roku privredno društvo je dužno pismeno izvijestiti voditelja postupka.

U cilju provjere i utvrđivanja stepena otklonjenosti nedostataka Komisija ima pravo izvršiti kontrolni pregled.

Pod uslovom da su nedostaci otklonjeni voditelj postupka će u roku od osam dana pripremiti rješenje - dozvolu za upotrebu i dostaviti ministru na potpis.

Član 10.
(Dozvola za upotrebu)

Dozvola za upotrebu rudarskog objekta, postrojenja, uređaja i instalacija sadrži:

1. *Naziv privrednog društva kojemu se izdaje dozvola;*
2. *Naziv mjesta izgrađenog objekta, postrojenja, uređaja i instalacija;*
3. *Nazive objekta i postrojenja sa tehničkim karakteristikama;*
4. *Obaveze privrednog društva da sve izmjene u projektnoj dokumentaciji dokumentaciju i čuvati svo vrijeme dok objekat traje i konstataciju da:*
 - *su objekat i postrojenje izgrađeni u skladu sa odobrenom projektnom dokumentacijom,*

- je privredno društvo uvažilo uslove date u dozvoli za izvođenje radova i
 - je privredno društvo uvažilo uslove navedene u urbanističkoj saglasnosti.
5. Obrazloženje i
 6. Pouka o pravnom lijeku.

IV – ZAVRŠNE ODREDBE

Član 11. (Stupanje Pravilnika na snagu)

Ovaj Pravilnik stupa na snagu osmog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo industrije,
energetike i rudarstva

MINISTAR
Doc.dr.sc. Željko Knežiček, dipl.ing.rud.

Broj: _____/12
Tuzla, _____2012. godine